



Канац куртаң община ялап куцайн ёхатса

Мосванан Канац куртаң община хоца ялап куца ёхтас. Там ай куртан энмам Алексей Мещеряков специальной военной операция элты ёхтас. Луң худ велпасалаты порая йис, па лув номас понас куртада нётты.

Ши веран Алексей каматса ясаң ястас: «Номас понтсам там куртэван улты худ велпаслаты ёхлува нётты. Мосал ун пу-маципа ястаты Никон Николаевича Куйбина, ванты лув катра порайн тамац рупата хар пуншас. Ин манэма мосал там вер туңа-щира елды туты. Худ велпаслаты муң хошлув. Туп елды тыныты ищи хошты мосал. Ши веран ма ялап юшат каншдам, холта мощатам худэв туты верытлэв, хоя тыныты. Щит элты худ велпаслаты мохилам щеп ох дойд. Ши тумпийн ялап хопат, холпат, лупат, мотурат па па хорпи



Хор: АНО «Ямал-Медиа»

Алексей Мещеряков СВО юпийн Канац куртаң община куцайн йис.

пормасат рупата туты ураңан мосдат. Айлат мохилув ищитый хуцтыя, щипорайн лув па вошата ант мандат па куртэва ун онтас тулат».

Мосванан хут бударка ялап вуйман уса. Лув кутэдан худлам катра иты верам хоп, па худам – кар элты верам хоп. Щитатан кентат яңхты,

туп мосал артадаты, хоты сахат вот порайн яңхты рахты питал. Товийн худ велпаслаты щира ямас лэщатасыат. Мосты пормасат иса лэщатасайт, луң сыс молты вер ант сохнапты ураңан. Алексей нумасал катра хопат иса талаң тэдан нох вуты. Лув ясаң щипран, щипорайн рупата сорапак па кентат манты питал.

Рупата сорапак манты щипран, хонна мосал уна пелка хашам хоятат элты уталтыты. Хоты сахат холап вошкиты, холта педа холап сыхтыйн нёдал каталты. Ловалты хоята кашң пуш ястыты, холта па хоты ловалты мосал. Ши тумпийн – ой тайты. Щипшан, кашң хоятэв ой ат тайл, аршак худ ат мощатад. Ши порайн хоттэдан амат па тэдаң пасан.

Аллина Тоярова ханшам потар

Хорам Щаня эвиет

Россия мувев доватан «Хон мув няврэмат» нэмпи касаспа пуншилдыса. Сот ветъяң педа нийл хораң рупатайт кутан ханты хор вуты нэ мойдапса питас.

Гильдия межэтнической журналистики Хон мувев Общественной палата пидан пилтацман там хораң касаспа лэщатасэл. Тампуш арсыр мув сыдат элты умац хорат китсайт. Мет аршак рупата Камчатка, Забайкальской край, Оренбургской, Самарской сыдат па Ямал мувев элты китамат.

Ши китам хорат кутан Елена Куртямова верам рупата пирыса. Нэман лэщатам мойдапсайн «Хорам Щаня эвиет» нэмпи хораң юкантса.

Нын па щимащ хораң касаспая пилтащиты верытлэды. Мир доват лэщатам «Анти па няврэмат шоши лумтам сохан» касаспая щёхар тылац 25-мет хатл унты хордан там ссылка хуват китадан: clck.ru/3UFimJ.

Иван Сандрин ханшам потар



Хор: Елена Куртямова

Тут питты вер элты хурыман уллаты

Ущ тылац вущ элты унт дор тылац хольмаңмет хатл унты округ доватан противопожарной режим постаман ул. Ши веран кашң хоята там хохтам хатлатан хурыманшак улты мосал.

Ант рахал унтан тут вуцитты. Хой ноптадман ки яңхал, рат харал такан йицкан шошамты верал ул. Нампар па сорапак торан вуцитты ищи ант рахал. Куртатан улты мохета, кашң хот пуңалан сопаса мосал катсот молтас литра йицк тайты. Хот пуңалан тут ант вуцитты.


Туныд округ доватан туп лапатъяң тут луң сыс питыдыйс. Ин худам лапат сыс – 149 питас. Унтат артан Пуровской, Красноселькупской, Надымской, Приуральской районатан ёслайт. Тут хуратман атаң хатл 168 хоят рупитал.

Нын молты тут ки шиядалты, 8-800-100-94-00 муй па 112 телефонат хуват ясаң вераты. Хота унтат ёслайт, рахал тата интерактивной карта хуват ЕКС ЯНАО https://map.yanao.ru/eks/forest_fires хоца вантты.

Аллина Тоярова ханшам потар

Волаң Ляльн нох питты ураңна

Адаңсахат, ущ тылащ 22-мет хатадан 1941-мет талан немшат роман Советской Союз педа лялясты питтасат. Щишан муң хоятлуд, опращлуд шоши мувев сайдаты нох лойсат. Хон мувев аратыман ар хоятэв антома йис. Там пуш 85-мет тада йис, хоты кашң тал хоятлуд кащталлуд.



Хор: Александр Тесленко

Законодательной Собрание Ямал мувев хоца айлат ёх ялап проект лэцатсат – «Единство ради По-



Хор: Иван Сандрин

Герой Советского Союза Н.В. Архангельский Лорвош район Мужи вошан ус. Уталтйым ашкуда лув нэмадан понман ул.

Ямал элты ищи ар хоятэв шоши мувев аратыман лялясты харата китылдыса. Хойтат дылңат ёхи ёхатсат, хойтат щита щи век кеша хащсат. Лувилал нумман тайты ураңна, ар уйтантыты лотат лэцатылайт, ашкудайн няврэмата потартылайт.

Хор: zkuynno.ru

беда» нэман нэматса. Щи щиран округев доватан вантапса харат пуншсайт. Мет олңа Пулңаватан 18 хоят элты потар туса, хой Волаң Ляльн нох питты ураңна ар юр понас: 9 хоят – Москва вош элты, 9 хоят па Ямал мувев элты. Кашң солтан хора понман ул. Хор щуңал хоца QR-код лэцатса. Ин ялап щиран кашң хоят лув телефонал тохи шашилдыллы па ин солтанэн нох лылңилдыл, хотя лув ус, энмас па маты мув суңан лялясас потарты питал.

Елды па щимащ хораң вантапса лотат тылащ сус Ладатнаңк, Новый Уренгой, Губкинской па Ноябрьск воштан этлат. Нын па там QR-код хуват вантапсая пилтащиты верытлаты.



Шимлаң рут мир ясңат шавиман

Россия мувев доватан «Наследие» нэмпи премия рахал питты. Щи ураңна мосал Овс мув шимлаң рут мир хоятат ясңат кеша онтас верты. Онтас верты кеша рахал проектат ханшты, хоты сахат шимлаң рут мир ясңатан потарты, шавиты па елды туты.

Хой Овс мув шимлаң рут мир ясңат педа самаңа ул па щи кеша онтас тус, лув верытлат щи касапса педа пилтащиты. Заявкыт мослат щёхар тылащ хусмет хатл унты китты там сайт хуват – конкурсы.рф.

Касапсайн нох питам хоятат сот щёрас солкувайн мадайт. Лув лэцатам проектлад международной «Фестиваль языков народов Севера» конференцияйн Хон Петра вошн, ай тахайт потты ветхощъяңмет хатадан эталтаты пилтлайт.



Хор: vk.com/arctic_languages

Овс мув хоятат юр арталдыман

Хащам лапат щутщиты хатлатан Ямал мувев мет юраң па каркам хоятат Новый Уренгой вошан актащисат. Хой мет юраң, апраң па харщи, касман арталдысат.

Там касапса «Северной характер» нэман понман ул. Лувел лапатмет пуш верла. Йи тал сус лув нял-вет пуш лэцатыла. Кашң касты ятал лув нэм тайл. «Тал» па «Тови» ятңан хащсат. Ин па «Луң» пора ёхтас. Кашң тал аршак хоят касты хара пилтащийл.

Ущ тылащ 20-21-мет хатлатан «Луң» ята кат щёрас молтас хоят касты ёхтылдысат. Округев тумпийн, холна Югра, Свердловской па Тюменской мув сыдат элты хоятат усат. Тампуш касты юшел хувшака па лавартшака лэцатсэл. Юраңшак хоятат 4 молтас километра йиңки-вощлахаң юш хуват хухалман 32-мет пуш юш лап ертам хопалэт элты уншсат па ваңксат. Ведщи пилтащийм ёх шималшак хухалсат – туп 3 километра еша антомшак.

Ханты хоятат ищи касты яңхсат. Ведщи пилтащийм хоятат кутан Ольга Кондыгина Пулңават элты ус. Лув хулмет места шитас, вет щёрас солкувайн мойласа. Юраңшак нэңат кутан Нелли Куртямова кимет тахая этас, хольмаң педа вет щёрас солкува шитас.

Ияха пилтащийм хоятат кутан «Адреналин» нэмпи команда Кев сыл район элты мет юраңшак улмал. Кимет места Новый Уренгой хоятат уймел. Надымской район касты ёх хулмет тахая питмел. Хой нэмомлты ант шитас, кимет касапсайн нох уратлат.



Хор: vk.com/severnoy_harakter

Волаң нётапса туты ханты нэ

Маргарита Петровна Батютенко (Возелова) Пулцават вошан «Мувхор» ай няврэмат хатл сыс яңхты хотан воспитателя рупитал. Си тумпийн СВО хося улты хоятлүва нётал. Там мосванан Тюменской область элты нётты хоятат пидан Курск воша яңхас. Там лопасан сит элты потрэм тулэм.

Ханты нэңиев СВО хося улты хоятата одаң хатл элты нётты питас. Вошеван нётапса верты тахаята мохты пидтасяс. Яха ёхтыдыты хоятат пидан сохам элты посат, кура думатты сэвам вайт, холпат сэвдат, венш сайлаты милат (балаклава), олты таха лаңкты па думатты сохат ёнтдат, пормасат акатлат, китлат. Кум тайман, иса вератлат.

Маргарита Петровна каншас, хой пидан СВО хося манты верытал. Рупата элты ант падал. Муй хорпи рупата ат ус, иса версалды лудан. Туп ляль хара нётты манты номас иса ванан тайсалды. Сит элты ситы ястас: «Каматса тал хасяс, Тюмень воша яңхем порайн, имолты тахайн холап сэвты нэңат шиялдасам. Ма лувидала нётты питсам. Телефон номерэм хайсэм.

Пулцават вошан хоятат па каншсам, хой пидан ляль манты хара яңхты рахал, муйн нётты верытдам. Акцияйт хося пидтасьсам. Сита шитам охат ляль хара китыдысам. Хасям талан Пулцават вош хоятат пидан манты лэсытысам, туп шеңк кашаңа йисам, ант вусайм.

Ядап тыдасы хатлатан Тюменской область «ДОБРО.РУ» проект хуват нётты хоятат элты айкедан ёхатсайм. Курск вош леккар хот реанимация рупитты ёх хоятат моссат. Ма лувидала ханшсам, ёх хоятат ант тайдам, ма манты верытдам. Ханшсайм, муя округ хоятат пидан ант мандан?

Тата хун каншдан, хол ахолта ханятыдат, вуты ант лаңхалайн. Ант уятдам, муя па ситы. Там мосванан Тюмень вош элты па

ханшсайм, вохсайм. Мохты кашасьсам. Рупатаем элты ант эсалсайм. Нэпек ханшсам, хатлат вусам.

Талта манмеман, хулам хыр лэсытсув. Потарты хошап хуват потрэмисам, инсясам, муй туты мосал. Тюмень вош элты Курск леккар хота звонитсат. Сита ястасат, каши ант сясыты (обезболивающие), роммалты портунат, ёш-кур ёвартты щашканат туты. Охат акатсув, портун дутсув. Портун тыныты хотан рупитты хоятатан лутасты тынэм еша тындышак верса. Вош хоятлүва ястасам, СВО хося мандам, нюлмат ёвартты щашканат мослат. Ар хоят нётас. Хулам хыра этас. Турам хотан рупитты хоятатан портунатан па лэсытсаюв. Тохлаңхоп датты тахайн па нётсайм, пормасдам ураңан ох ант сохаштасам».

Манты тахайн муйн лавадса

Ханты нэңиев Тюмень вошан карты юш хуват яңхты хопа омасмал порайн,



Хор: Маргарита Батютенко



Маргарита Петровна Батютенко

хоятдал пидан ванашак уйтантыйс, потрэмийс. Лув пилэлан манам хоятдал волаң рупата тайдат. Кум шитман, ляль харан улты хоятата нётты яңхлат. Сит элты потрал ситы тус: «Лув каматса пуш тохи яңхсат. Кашң группа лув кешайл лэсытам тахая ханшлтаман ул. Антом холта яңхты дитлайт, тохи мандан. Кашң лув ястам тахаядан рупитты питад.

Тюменской область хоятат Курск вош леккар хот реанимация отделения лунтасман улдат. Тохи ёхатмев порайн, мохты инсясаюв, хой укол донсыты хошал? Ашкуда етшамем юпийн, медицинской училищайн уталтысам, сита укол донсыты уталтасаюв. Ма ханшлтасайм. Мосаң хун мосты хоят ант питад, укол понты хошты ма хорпи хоят, нётты верытал.

Одаң хатадан, хун муң тохи ёхатсув, ма ант эвалсам си арат шеңк даварта мушмалтам хоят шиялаты. Хун лув муң ещадтэв этсат, ма палтамасам. Хоты дойсам, ситы дойты хасьсам. Си арат вур, хой ёш-кур, сэм ант тайл, ар олты хоят ус. Олты тахайдал лаңкты сох ант тайлат, портунан ант тарамлайт. Тухал хоятат ёш элты лапатты мослат. Лувидал лапатдан, наң па сэмъйиңклан манлат. Нумасдан, тата молты тахайн округ элты, мосаң па ханты хоятэн па ул. Ляль хар элты мушмалтам ёх мохты ты тулайт. Хол тохам сохан, каши, палтап элты увлат. Муңева лувидал лёхитты, думатты мосас. Хой дойты ант верытал, ал йиңки щашканан муңхда па думаттала. Ситы леккарата нётты хоятата усув».

(Елды па ул)

Альбина Тырлина ханшам потар



Хор: Маргарита Батютенко

Тэк хантэт йис верат елды тувман ул

Там ванан Суматвош район Тэк курта яңхемн ма уна пелка ювам ими Галина Михайловна Курганова (Новьюхова) пилн уйтатсам па потартсам. Новьюхов рут элды потартты ки, щи ёх хунты хувн Кунавт мув элды Тэк мува касалсат. Тата дыв Новьюхов опрац нэм тайты питсат. Ад па, нови юх, нови ох муй па пасыр ясац элды опрац нэм тыйс.

йис потрат, мончат, арат актас, щалта туса нэпека ханшас па Югорской госуниверситет хоца улам ханты яснап научной центра китас.

Дув похл Дмитрий Юрьевич Курганов аньтел иты ар тал ашкулдайн рупитл па «Информатика» урок тул.

Щутцаты манмалн Галина Михайловна Курганова па ун куртац имет пилн «Ас нэ» па няврэмаң

Дув ащел Михаил Андреевич Новьюхов Вошрэң куртац икия ус, аньтел Екатерина Семёновна Рябчикова ус. Дыв семьяелн нийл няврэм сэма питсат. 1942-мет талн ащел ляля манас, Ленинград вош пуналн лялясас. 1944-мет талн ёхи керлас. Дув худ па вой велпаслас, имел «19 партсезд» нэмпи колхозн мис пусты нэна, торн сэварты нэна рупитас па арсыр рупатайт верас. Туңа-щира щукцатас.

Галя Тэк куртац ашкулдайн вет класс унты уталтыйс, елды Суматвоша манас, щита ашкула етшаптас. Щи юпийн Челябинской область Миасс вошн геологоразведочной техникуман уталтыйс. 1970-мет талн геофизика йис, нэпекаң ёх Узбекистан мув Ташкент хон воша рупитты китса, ванты, 1966-мет талн щита землетрясение ус, щипан вош ялапитты мосас. Елды 24 тал хиш мувн йиңк каншас, заводан рупитас. Икеңа йис, семьяйн кат похңан сэма питсаңан, итл антома йис.

СССР мув ара питам (лакки лосытам) порайн, Галина Михайловна 1994-мет талн Дмитрий похл пилн ёхлы Тэк рут куртэла керлас, ашкулдайн «География» урок тус. Щи тумпийн, дув щи порайн ванан улты куртата яңхидыйс па пирац ёх элды



Куртац имет пилн «Ас нэ» па няврэмаң «Ай Ас ёх» ансамбльңан версат.



Галина Михайловна Курганова – тус ёшаң ханты нэцев.



Арсыр шоши мир касапсэти каслат па нох питлат.



Г.М. Курганова тонты онтап ёнтад.



Дув тонты элды арсыр хорамаң пормасат верты уталтал.

«Ай Ас ёх» ансамбльңан версат. Дыв ияха арсыр куртата, вошата етхот альман яңхлат па ишакты нэпекат пилан ёхлы керлатат. Лорвош район «Ван рутат» фестиваля ищи ар пуш ёхтыдысат. «Шеңк умащ ус Челябинской областын лэщатам ун фестиваля яңхты, муң ансамблев щита нох питас», – Галина Михайловна щи рупатайд элды ястас.

ЩИ тумпийн Галина Михайловна тонты элды арсыр пормасат верты уталтал, ястал: «Айтэдн ма вантсам, муй щирн аньтем тонты хорас, лэщатас, щалта арсыр хорамаң пормасат

верас. 1990-мет талатан Ёмвош округеван Касам, Вах тонты элды пормасат верты уталтаты харат лэщатты питсайт. Ма ищи номпса ёхатсайм альты, муй щирн муң хоцаев Тэк хантэт тонты пормасат вердат. Мосад ястаты, Овс хантэт еша йи хорпия вердат, ханшет еша йи хорпет, Вах ёхан хонаңан улты хантэт – па щирн вердат, дыв пасыр ханшет тайлат. Ма Тэк куртац ашкулдайн кружок хоца эвет тонты пилн рупитты уталдасам, ин щи вер елды ханты ясац уталтаты нэ Олеся Вячеславовна Хандыбина тул. Дув холна елды няврэмаң ансамбль тул».

Яң тал ёхлы Галина Михайловна Курганова Пулцават воша «Душа тундры» фестиваля вохса, дув щита ищи тонты элды арсыр хорамаң пормасат верты аратад мир уталтас.

Интам Галина Михайловна щутцаман хилдылада ернасат ёнтад, ястал: «Хилдыдам айтэдн ищи ханты арат арылат, яклат, интам арсыр шоши мир касапсэти каслат па нох питлат. Ксюша хилднэнем Санкт-Петербург вошн А.И. Герцен нэмпи университетн улты Овс мир институтан уталтыйл па ин тый ёхтас па няврэмат ханты якат якты уталтал. Щит ма урцема ун амат!» – Галина Михайловна Курганова ястас.

Людмила Шульгина ханшам потар

Муравленко тэс ёшаң нэңэт

Тэм ванән Пулңават вочән ёнтэсты нэңэт «Ямалица» нәмпи емәң хатл вәри. Увэс мув нэңэт ёнтэсты верән касты ювит. Ар сикең ернас, ной сах, ики ернас, неврәм тойты сух нэңэт тыв тосәт.

Муравленко воч қолум нә ёнтум пурмаслад тосәт: Федосья Тимофеевна Вылла, Елизавета Пенчакувна Тарлина па Галина Пенчакувна Кечимова. Тэм нэңэт кашәң ол ёнтты утлад Увэс мув конкурса толәт.

Федосья Тимофеевна Вылла 1946-мет оән сәма питәс. Лапәт ода юви-мән ёнтаста питәс. Ёинтпәд кашиң хатәд котән тоил. Ар сах ёнтәс, ар нир ёнтәс, ар ернас ёнтәс волтәд марән. Ёнтэсты сухлад ханшийн ёнтәсл, йис верум щирән иса верийл. Лув қолум эви тоил. Эвиләд ёнтасты онәлтәс. Елизавета, Виктория, Галина сук верләт, ханшәт ёнтләт, ернас верләт, тучаң па намәт ёнтләт. Ақкиен ема ныңат онәлтос.

Елизавета Пенчакувна Тарлина – тос ёшең ханшәт ернаса ёнтәл, щешкан сака, нирәт ёнтәл, молупсы, мил, пос. Арсыр конкурса верум пурмаслад китыдыйс. Лув ақкел иты кашиң хатәд ёнтосты вер тоил. Ин лув па конкурс «Ямалица» пурмасәт тос. Мира аляс.

Галина Пенчакувна Кечимова – ема ёнтэсты па ақкиен онәлтоса. Лув щешкан сак, ханшаң ернас ёнтты вер тоил. Сук верты па хошел. Арсыр конкурсата еңхал. Верум пурмаслад тэм ол конкурс «Ямалица» хуцна кимит места вус. Чи пырән неврәмат онәлтәд школаин, па воспитателя интернатен Муравленко вочән ропитәд.

Тем тос нэңәта ем ясең ястелүв, елды йинтупләд ат котән тойләт, ар нәви пурмас ат верләт!

Галина Кечимова ханшәм потар



Хотгәд хоятлад пидан.



Федосья Тимофеевна Вылла



Елизавета Пенчакувна Тарлина, Галина Пенчакувна Кечимова па Вера Гавриловна Вылла пидан.



Ёнтөм сохлада луматтам нәңәд.



Касапсая тутдыйм пормаслад.

ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоца улты мохета мадайт. Щи тумпийн нәңада, няврәмлада, ақкидала па ацидала ищи нётопса вуты рахал.



СЛУЖБА ПО КонтРАКТУ В ВС РФ

полная информация по телефону
+7 (902) 816-11-90
+7 (34922) 3-98-08
звонки по России бесплатны

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КонтРАКТА НА ЯМАЛЕ

ОБУЧЕНИЕ:
✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ ПОДГОТОВКА
✓ МЕДИЦИНСКАЯ ПОДГОТОВКА

3 600 000 Р ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО
400 000 Р ДО 120 000 Р

ОТ 225 Т. Р

Сорашак айкел моцатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты талаң лапат хаңал. Щи веран, сорашак айкелат моцатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоца моцатыты.

Щи ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан әлты ищи нопсәв тыед-тохел поныдылэв, вантлэв – мата айкелат па муй әлты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясең шавилэв!





Шөпэрқи

(Олаң шупал № 25 луңталн)

Өс ту айпи мата пәхәл һаһ күч вәй, күч ләйәлта илә пөнчләмтәтәх, шунтукәли илә күч пөнчләмтәтәх:

– Ту нә қөтты? Төм пайләх сиккәһ һаһ, ар пәкәт вочәт-учәт, ту һаһнә, – панә йәстәл, – вәт тәқа!

Пөнчләмтәтәх, панә сорха ылә тәврәмтәтәх. Сор сәмәп йәхнә йа вуйи, өс қөйәхи һатхә ләйләхәл, ту йәхнә әнтә пә вуйи.

– Тәқа тәм һаһ төңкә йәм. Әнәл мата йимәһ қәтләтнә литахә. Йа, тәт ти. Өс һаһ вәрәнтәт, нәһ ту һыңлән. Өс лүвә йәрнас вәрләт. Қәлтөхил лүв йәрнасат вәрләйәм.

Панә ту йәрнас вәрәт өс. Пыр аләһнә йәрнасәтат туват. Ту әнәлпи пәхәл йәрнас вәй, йәстәл:

– Тәми тәқа әлә вәлтә қәтәлнә ләмтәхә. Рәпиттәнә тәйтәхә.

Өс күтәппи пәхәл йәрнас вәй:

– А тәми пөвәлтәхә йәңқилтәхә йәм йәрнас.

Өс ту айпи мата пәхәл ти йәрнас вәй, панә йәстәл:

– Өх, тәқа! Тәми төңкә йәм йәрнас, тәми әнәл мата йимәһ қәтләтнә ләмәтли.

Панә ту пырнә пори вәрәт. Йәх йәһтәхә йәхәт, литахә йәхәт. Ар пәкәт әпләһ мата әтәт вәрәт, ту литәт вәрәнтәтә йәхлал. Панә ту йәмәтчәк ләскамил кимнә, ти әй мәта ләтнә кәмән ти нөрхәмәх, сүй төңкә пайләх тарәм. Панә йәх кәмнам нүрәхтәт, ту ай пәх йәкәһнә омәсл.

Кәм күч йөвтәт, әй мәта вәр пә әнтәм. Йәкә ымләт, өс сарнам йәһтәхә-литахә ләйхәмәт. Йәмәтчәк өс йәкәхә ләйхәмил кимнә, ту йәкәхә ләйхәмил пырнә, әй мәта ләтнә өс әй туминт сүй ти лирты пит. Йәх әйнам кәмнам нүрәхтәт. Кәм күч йөвтәт, әй мәта вәр пә әнтәм, күч ләйләхәләт. Өс йәкә ләңәт. Панә йәстәләт:

– Тәқа, өс, кәмнам әнтә мәнлув – тит урасләлөйув.

Панә өс ләйхәмәт, йәкәхә-йәһтәхә уч, панә өс әй мәта ләтнә қәләммәтхә туминт сүй ти лирты пит. Ту ай пәх кәмнам



Хор: Людмила Айваседа

қөвәлхийәл. Йәһ йәк киһта вөккәһ йәхнә күч кәтләхәлли, әй ту арит кәмнам нүрәхтәх, панә әй ләтнә һыңәлнәт тәт йәкә ләңәл. Панә ту йәкәхә уч йәхәт.

Панә әй мәта ләтнә, ту пори тәрмәм пырнә, ту мәта вәлмил пырнә, әй мәта ләтнә Төрәм Қон Ими йөвин нәқ



Хор: Людмила Айваседа

вәрәхләх. Тәми мүвәли? Қөт ләхпи төққаха мата нәқ қөтәл. Лүв нәмәқсәл, қөты йәхи өс? Қәтәлхә йәх мүвә, ти қөвит мәрә әлли? Панә кәмнам мән. Кәм күч ливәт, кәмән пәтәхләм. Ти қөты ар сөһнам най төләхләл. Йәкә ләң. Най вәтәхләх мүвә қөты йәх, нәмәқсәл. Йәк қөт ләқит ти ләйләхәлтәхә, ләйләхәлтәхә вәрәл. Ту айпи пәққәл-мәһхәл қөт ләқийә күты төл сохит най төләл.

Панә лүв күтәлнә һәв-миләл: «Төм пайләх сиккәһ а! Лүв өләһ нөптәл қөвит мәһ тәнә мәһат вәлл, ти сивәлнәт». Панә ту шөпәрқи сөвәл лүв өвтылнә төт әләл. Панә ту шөпәрқи сөвәл найа йәвәттәх. Кәр най нәқ үлтәх. Ту тәләккә йәхмәл кимнә панә ту тәләк өвтыһа төвә йәвәттәх, ту сөв. Панә ту нә қәләттә мәнһпәх.

Ту қө йөвин панә нәқ пит. Йистәхә йәх. Ушә қөты йәх? Мүв шир вәрәт тит вәрәт? Панә илнам сөчәм. Йәкәһнә вәлтә кичәл пә вәлләх йәх. Тә мән, мән. Әй тохинә қолхиләл. Ләйәл: йөвин мәнәл. Төвә йөвин мәнәхә йәм. Әтәр атәли қөсәт тәт – тәхнам ләйәлләт нөмәлтә. Ту мән, мән. Әй тохинә нәмәқсәл: «Ти өләһ өт қулмәхтәләм, ма тәхәнә нөмән йәңқилтәхә йәләм қунтә, өс тәл лирты питтә нәһи пәқи, пәв пәқи ещә йөвин йәңқиләл». Қолтаң қәләт, ләйләхәлтәхә йәх, най үлтаң қәләт, йухат. Тәми ләйәл: моқи сар қунта йух тувәм тохи. Өс сарнам мән, мән. «Өс ма қолтам пәтан йух туви». Өс мән, мән. Та, тәм олнә пә тит йух туви. Панә сарнам вәх ләк, кәв ләккә йәл. Панә ту ләки мән.

Мән, мән, әй ләтнә қөта йөвәт. Ту ими... ими төттә. Йәкә ләң.

– Нүһ, тәм, қылхәләм, нүһ мүват йөвтәһн? Тәт қыла нүһ, – мәттә.

Чайат уч йәһәлты ту өпилнә, тәтөпилнә. Панә һәвмәл:

– Нүһ төм пайләх, қылхәләм, йәм нә тәйлән?

(Еллы па ул)

Аграфена Сопочина
нәпека ханшаллы

Емаң тутцаң

Имолты порайн ун пиращ ими ус. Шеңк апраң хилы эви тайс. Муй рупатая вуянтал, патэл унты нэмолты верал ант тулды.

Ун аңкелан йиңк туты ши партда, эвиев нык манал, путдал йиңкан амартдалды па йиңк шар элты волиты хусат педа ванттал элты, сэмал тохел ольмал. Утды педа еша шушмал, хомлах кащалад. Путдал ил омасдалды па хомлахал торн лэран нюхалман тулды. Ун аңкелан йиңки путдал пидан ёхи давалда. Ёнтты кашн, эвев ши верал холты ёрэмалды. Пиращ ими эвел ши вохдалды, ши вохдалды, ант щащала. Щалта ши, ун аңкел

Хирал дыпийн, хилыел ураңан шавийм, ханшийн ёнтам хорам вайңан тайс. Давласас, хун эвиел энамал. Ши вайңалад нох вуслы па осам хирал хоша ил ханятсалды. Тутцаңала па яма татлам кат кепал понас.

Хилы эвиел ёхи лоңмалан, ун аңкелан вана вохса па лув пуңдала ил омасты партсалды.

– Ёнтасты ураңан, ма хорам тутцаң тайдам. Хирыем шавиман тайты ки, яма пойкащман лув пилэлан потарты, лув шеңк хорам сохат маты верытал. Туп ши кеша потар-ар уталтыты мосал. Атма уталтыман, тахрамтыман потарман, ясаңдал кутладан па щиран ястаман,



Хор: Иван Сапрын



Хор: Иван Сапрын

турсий худман, йиңки путдал элты нумалмал па щитдал ураңан ёхлы хухалад.

Эвиев юх акатты китла. Щита па ёнтты кердал. Варас элты хотые верал, питар хуват шушидыман, хорам кеват акатал. Ун аңкелан па кур алты ёлан давалда.

Ёнтасты па вуды сох таталты ун аңкелан уталтаты вутщиса. Нэмолты ант тыйс. Ётлащты дойд па ант хошащала, сохдал ил раканал, хота па ётлащайл луттал. Татласты омпысыйл, хота муй. Кат-хулам пуш ёшал туземалды па кепал ел воцкалды. Навратлыты, сора-сора ким хухалмал.

Ун имев кул номпса питас: амуй щиран хилы эвем веранты уталтаты? Имолтыйн номасан ёхатса. Ват ухдал элты хорам тутцаңал эдпа вуслы.



Хор: Иван Сапрын

нэмолтыйн ант малайн. Ёшен лыпия эсыйи-са. Ванты са, хирэн муй щита тайл?

Эвиев ёшал хир лыпия ши вортсалды па татлам кат кепал эдпа талас па мохты ел нюхмантас:

– Тами муй? Кат кепал! Хорам вайңан па хота улдаңан?

Ун аңкелан еша роммалса:

– Мет олңа потрэн уталтыты мосал. Яма уталталэн ки, мосаң молты щитлан. Худанта па ма юпеман потарта:

**Хорам тутцаң хирые,
Ёнтасты ма хирыем.**

**Лэпат сохат щита тайдам,
Татлам кепал тохи пондам.**

**Лондам яха акатдалдам,
Ай ёдыйн ма ёнтасдам.**

**Ши порайн тутцаңеман
Хорам вайн мойдалайм.**

Рупитты каш ант тайты эвев холдап турсыя хащ ант питал:

– Там потар-ар хув ат ул! Лувел луңаттэм элты холты марэмадайм. Муй щиран ма лувел уталталэм?

Ун имев номпсал хол шакас. Эвел педа ястал:

– Нэмолты верман навратлытэн юкана, ил лудан омассан па потрэн уталтасэн. Я па ши ат ул. Ешаул пунаң вайңалан иса тайтэн элты няра па вусаңа йилңан. Ялап от холща вулан? Ма пирщамасайм, сэмлы питсам, ёшлам кашет. Ёнтасты ант верытдам.

Хилыелан ант и худантса, хухатлыты кимлы педа щиты ши манас. Ясаң ант худантты эвел уятман, пиращ ими вуслы па тутцаңал элты татлам кепалдалад нох вуслы. Ши юкана сорма щуңкардам кепал тохи понас па давласты питас.

Хилы эвел давалтал элты, ун имев хотаң вердал холдыена версалды, лэтот кавартас. Етна пелка пощтул эвел ёхи ёхатмалан, лувел вана вохсалды па тутцаң хирал валэматы парсалды. Эвиев ант лаңхаман кашащас.

Ин ун аңкелан уталтаты партам арал арыты питсалды па тухал ясаңдал холты ёрэмаслы. Сора, сора ёшал хир лыпия эсалсалды па кат сорам кепал эдпа талас. Сэмлаң уна сухтаман, ун аңкел педа кердас. Ун имев па няхал ханятман, эвел педа ястас:

– Потар-арэн яма ант уталтасэн па ванта муй тыйс.

(Елды па ул)

**Зоя Куртмямова нэпека
лэщатсалды**



Хор: Иван Сандрин



Хор: Иван Сандрин

Ялап тонтыйн лацкам хот

Хащам лапатам Канащ похалан «Тонты хот» уталгыты хар манас. Ёмвош округ Сургутской район Угут курт элты тонты пидаан рупитты нэццан – Альбина Лазаревна Ярсомова па Ирина Александровна Юнкер вохилдысайцан. Пулцават вош элты Сергей Викторович Романов па Зинаида Викторовна Лонгортова усцан. Дын па тонты элты пормас верты хошладан.

Талаң лапат верантты ёх тонты сыстаптасат, йицка понылысдал, кавартсэл па кутладан яха ёнтсалдал. Щимащ рупата утца верты щир ант тайл. Катдангыты хоят иса мосал. Пормас шавиты хотан рупитты эвет, вош элты ёхтылдым нэццан – Татьяна Ивановна Енова па Анна Леонтьевна Русмиленко кашц хатл рупитты мохета нётсат. Щиты ар хоятан рупитман, хот лацкты сыхат талаңа щи йисат. Юр понман па хащам лопсат талаңа акатман, хот ялап тонтыйн лацкса.

Руваң хатлат порайн, тонты хотан ям, ёлах, педца шеңк антом. Аталан,



Хор: Зоя Куртымова

ат йицк питтыйн, хот дыпийн хошам. Ай порайн тамащ хотатан щи энампусв. Ин щи вер ёрэматы питса. Канащ похалан рупитты ёх щи катра вер нох туңматсэл.

Мохет рупитты сыс, пормас шавиты па верантты хара мойң хоятат ёхтыдысат, вантысат, умащдысат. Ощхуль каншты отат инцассат, муй рупата верда па муй щит элты тыйл. Щимащ хоятат кутан Краснодарской мув сыд элты ёхтам мойң хоятат усат.

«Кашц хоят дув рут мир улапсайл щиран ул. Вантман шушидыман, дыпеман щикем ям: нын там катра пора щирлан ант ёрэмаман тайдалдан, яха уйтантылты, верантлаты. Катра лаварт порайн, муй хорпи ошаң ханты хоятат удмел. Муй арат ош па юр мосал, тамащ пормасат ёшан вертыя.

Там муватан улты хоятата ястаты утшидам, мув сыдан шавиман таядан, няврэмдан энмалтадан. Йис пора улапсайн елды тувалан. Турмев сыстам ат ул», – мойң ху Сергей Викторович Шубин ястас.

Зоя Куртымова ханшам потар



Хор: Зоя Куртымова



Хор: Альбина Гырлина



Хор: Альбина Гырлина

Газета «ДУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д. 1, каб. 106
+7 (34922) 4-68-63
E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 200 тз
Подписные индексы:
на год – ПА700, на полугодие – ПР561

№ 26 (1329)

Газета вышла в свет 27 июня 2026г.
Подписано в печать 25 июня 2026г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

Генеральный

директор
АНО «Ямал-Медиа»
Зулинова
Марья Андреевна

Главный редактор
Яковлева
Аллина Кирилловна